

Pisortani ataatsimoorussamik aningaasaqarnermut aamma sulisoqarnermut allaffissornikkut IT atorlugu periaaseq pillugu Namminersorlutik Oqartussat nalunaarutaat

Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. 26, 28. november 2016-imeersumi Inatsisartut inatsisaanni nr. 24, 28. november 2018-imeersumi allanngortinneqartumi § 46a, imm. 1, nr. 1 aamma 2 naapertorlugit aalajangersarneqarput:

Kapitali 1

Aaqqissuussaanera aamma inatsisitigut inissisimaneq

§ 1. Kommunit aamma Namminersorlutik Oqartussat, aningaasaqarnermut aamma sulisoqarnermut allaffissornermut tunngasut pillugit Namminersorlutik Oqartussanut aamma kommuninut ataatsimoorussamik IT atorlugu periaatsimik pissarsinissamut, ingerlatsinissamut, allanngutsaaliuinissamut aamma ineriartortitsinissamik qulakkeerinninnissamut, immikkoortortamik pilersitsissapput.

§ 2. Immikkoortortaq Namminersorlutik Oqartussat ataanni ingerlatsiviuvoq.

Imm. 2. Aningaasaqarnermut Naalakkersuisoq immikkoortortap siulersuisunit, takuuk § 3, inassuteqaat tunngavigalugu immikkoortortap atissaa pillugu aalajangiissaaq.

Kapitali 2

Aqutsisut aamma siulersuisut

§ 3. Immikkoortortaq pisortani ataatsimoorussap aaqqissuussaanerani siulersuisut aqutsisuupput, pingaarnertigut aqutsineq isumagisarissallugu aammalu immikkoortortami suliaqarfinni suliassa qarfiit, aningaasaqarneq aamma ingerlatsivimmi aqutsineq pillugit apeqqutini pingaaruteqartuni tamani aalajangiisassallutik.

§ 4. Siulersuisut 7-inik ilaasortaqarput suliaqarfinni periaatsini, immikkoortortami taparserneqartussani, ilisimasaqartunik paasisimasaqartunillu. Naalakkersuisut siulersuisuni ilaasortanik marlunnik, tassungalu ilanngullugu siulersuisut siulittaasussaannik toqqaassapput. Kommunit tamarmik immikkut siulersuisuni ilaasortamik ataatsimik toqqaassapput.

Imm. 2. Siulersuisuni ilaasortat ukiunut marlunnut toqqarneqassapput aammalu

toqqarneqaqqissinnaallutik.

Imm. 3. Siulersuisuni ilaasortat aningaasarsiaqartinneqanngillat imaluunniit suliassamik isumagininnerminnut allatut akissarsiaqartinneqassanatik.

§ 5. Siulersuisut nammineerlutik suleriaasissartik aalajangersassavaat.

Qullersaqarfik aamma sulisut

§ 6. Immikkoortortaq pisortani ataatsimoorussap aaqqissuussaananerani ulluinnarni aqutsineq pisortamit isumagineqarpoq. Pisortaq siulersuisunit atorfinitsinneqassaaq soraarsinneqassallunilu, taamaattoq takuuk § 16, imm. 2. Atorfeqarfigineqartoq tassaavoq immikkoortortaq.

Imm. 2. Pisortaq Namminersorlutik Oqartussat qitiusumi allaffeqarfiata ataani sulisoqarnermut allaffissornikkut aqutsinermut aningaasarsianut isumaqatigiissutit killissaliussallu atuuttut tunngavigalugit atorfinitsinneqassaaq soraarsinneqassallunilu.

Imm. 3. Qullersaqarfiup akisussaaffii suliassaalu pillugit aalajangersakkat erseqqinnerusut siulersuisunit aalajangersarneqassapput.

§ 7. Pisortaq immikkoortortami sulisunik atorfinitsitsisassaaq soraarsitsisassallunilu, taamaattoq takuuk § 16, imm. 2.

Imm. 2. Sulisut Namminersorlutik Oqartussat qitiusumi allaffeqarfiata ataani sulisoqarnermut allaffissornikkut aqutsinermut aningaasarsianut isumaqatigiissutit killissaliussallu atuuttut tunngavigalugit atorfinitsinneqassapput soraarsinneqassallutillu.

§ 8. Tjenestemandinik atorfinitsitsinermi soraarsitsinermilu siulersuisut imaluunniit pisortaq tamanna pillugu Naalakkersuisunut inassuteqassapput.

Kapitali 3

Suliassat aamma aningaasalersorneqarnera

§ 9. Immikkoortortaq pisortat periaasiannik ataatsimoorussamik Enterprise Resource Planning (ERP), aningaasarsialeriffimmik aamma angalanermi akiligassanut periaatsimik pissarsissaaq, ingerlatsissaaq, aserfallatsaaliuissaaq aammalu ineriartortitsineramik qulakkeerinnissalluni. Siulersuisunit inassuteqaateqarneq malillugu aammalu kommunit tusarniarneqareerneranni, IT atorlugu periaatsit allat suut aningaasaqarnikkut sulisoqarnikkullu allaffissornermut tunngasut pillugit IT atorlugu periaatsitut ataatsimoorussatut isigineqassanersut, Naalakkersuisut aalajangersinnaavaat.

Imm. 2. Namminersorlutik Oqartussat aamma kommunit IT atorlugu periaaseq, IT atorlugu periaatsitut ataatsimoorussatut isigineqartoq, atussavaat.

§ 10. Immikkoortortaq ukiumoortumik aningaasaliissutit aningaasanut inatsimmi immikkoortinneqartut iluanni suliaqarnerminik ingerlatsissaaq.

Imm. 2. Ukiumut aningaasaliiffusumut pisussamut missingersuutit, ukiumoortumik ataatsimoorumik tapiissutitut isumaqatigiissuteqarnerup peqatigisaanik, isumaqatigiissutigineqassapput. Kommunit

akiligassaar, takuuk § 11, imm. 1, aningaasaliissutitut imm. 1-imi taaneqartutut aningaasanut inatsimmi immikkoortortamut immikkoortinneqartutut, nuunneqassapput.

§ 11. Immikkoortortap IT atorlugu periaatsinik ataatsimoorussanik pissarsineranut, ingerlatsineranut, aserfallatsaaliuineranut aamma ineriartortitsineranut aningaasartuutai kommuninut 50 procentimik aammalu Namminersorlutik Oqartussanut 50 procentimik agguarneqassapput.

Imm. 2. Kommunit akiligassaar innuttaasut amerlassusaar 1. januar ukiup aningaasaqarfusup siornani naatsorsorneqartut malillugu agguarneqassapput.

Kapitali 4

Missingersuutit, naatsorsuutit aamma kukkunersuineq

§ 12. Immikkoortortap ukioq naatsorsuusiorfia tassaavoq ukioq aningaasaliiffusoq.

§ 13. Immikkoortortaq, ukiup aningaasaliiffusup tullianut aamma ukiunut missingersuusiorfusunut pingasunut ingerlatsinermut sanaartormullu missingersuutitut siunnersuummik, ukiut tamaasa Naalakkersuisunut aamma kommuninut tunniussisassaaq.

Imm. 2. Ingerlatsinermut sanaartormullu missingersuutitut siunnersuut, pissarsinermut, ineriartortitsinermut, aserfallatsaaliuinermut ingerlatsinernullu suliaasat nassuiarneqarnerannik kiisalu sunniteqarluarnerulersitsinermi iluanaarutaasussatut missingersuinerneq imaqassaaq.

Imm. 3. Naalakkersuisut ingerlatsinermut sanaartormullu missingersuutitut siunnersuutit tunniunneqarnissaanut piffissamut killissaliussamik aalajangersaasinnaapput.

§ 14. Immikkoortortaq, Namminersorlutik Oqartussat qitiusumi allaffeqarfiata ataani suliffiup iluani allaffissornermik aqutsinermut, naatsorsuutini allattuinermut aamma aningaasaqarnerup aqunneqarneranut maleruagassani malittarisassanilu sukkulluunniit atuuttuni, pineqartutut ilaavoq.

Imm. 2. Suliffiup iluani allaffissornermik aqutsineq, naatsorsuutini allattuineq aamma aningaasaqarnermik aqutsineq, immikkoortortaq sinnerlugu Naalakkersuisut isumagisaraat. Tamatumunnga aningaasartuutissat Naalakkersuisunit aalajangersarneqassapput aammalu § 11, imm. 1-imut aamma 2-mut naapertuuttumik agguarneqassallutik.

§ 15. Immikkoortortaq, ukiup naatsorsuusiorfusup siuliani suliaqarnini pillugu Naalakkersuisunut aamma kommuninut allaganngorlugu nassuiaammik ukiut tamaasa suliaqartassaaq. Nassuiaat nunap karsiata naatsorsuutaasa kukkunersiorneqarneranni ilaatinneqarsinnaanngorlugu, ilusilerlugu tunniunneqassaaq.

Kapitali 5

Atuutilernera aamma ikaarsaarnermut aalajangersakkat

§ 16. Nalunaarut ulloq 1. august 2019 atuutilerpoq.

Imm. 2. Nalunaarutip atuutilernerani sulisut, ilanngullugit ulluinnarni aqutsisut, Enterprise Resource Planning systemimi suliaasanik suliaqarnissamut atorfinitsinneqarsimasut, atorfimmud nalunaarutip atuutilernissaata tungaanut atorfigisimasaminnut naapertuuttumut maannamut pisartutut

aningsarsianut atorfininnermullu atugassarititaasut assingi atuutsillugit, immikkoortortamut nuutinneqassapput.

Namminersorlutik Oqartussat, ulloq 24. juli 2019

Vittus Qujaukitsoq

/

Nikolai S. Christensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut